

PROGRAM AUDIT TEKNOLOGI SIRIM MANTU PKS NGANGKATKA PRODUKTIVITI

October 7, 2016, Friday
The Borneo Post

KUCHING: Program Audit Teknologi ke dipejalaika SIRIM Program Audit Teknologi Berhad ulih mantu ngangkatka produktiviti Dagang Mit enggau Jalan Pemesai (PKS) ngambika ulih balat agi besemekih, inovatif enggau produktif lalu diterima ba makit antarabansa.

Presiden ti mega Ketua Eksekutif Kumpulan SIRIM, Dato Dr Zainal Abidin Mohd Yusof madah, program nya diteladan ari program ‘Frounhofer’ nengah kerejasama SIRIM enggau Institut Fraunhofer, Jerman sereta disukung perintah Malaysia lalu asil iya disebut SIRIM Innovation Modul.

Ba bulan Julai 2016, bisi 87 Audit Teknologi udah dipejalaika nengah 41 projek dikena Meransang Pemansang PKS enggau 24 Nguna Teknologi.

“Di Sarawak naka ke diatu semina 10 buah kompeni udah diaudit SIRIM nengah Program Audit Teknologi.

“Nengah program audit teknologi tu kami semina milih sekeda kompeni ke ngembuan produk ke bisi potensial (ngereimbus makit antarabansa),” ku iya.

Zainal mansutka pekara nya dalam aum pengarang berita program ‘SIRIM – Industry Engagment’ ke diatur begulai entara SIRIM Berhad, Opis Menteri Pemansang Industri enggau Orang Dagang, Pengawa Dagang enggau Pemeranak Puku (MIETI) & SME Corporation Malaysia, FMM & SMA, ba sebuah hotel ditu, kemari.

Program SIRIM – Industry Engagment nya kemari udah mujur dipenyadika Menteri Muda Pemansang Industri (Pemeranak Puku enggau Promosyen) Datuk Julaihi Narawi.

“Program Audit Teknologi tu ngemeratka enam komponen besai baka produktiviti, trend dalam proses enggau chara, teknologi pengurusan, pengereja pengawa, organisasyen enggau strategi teknologi,” ku iya.

Bejaku baru iya madahka ngena SIRIM Innovation Modul, perintah besai minta SIRIM nempa kerejasama enggau universiti di menua tu nyengkaum universiti peribit kelimpah ari PKS.

“Di Sarawak, naka ke diatu kami nempa kerejasama enggau Universiti Malaysia Sarawak (UNIMAS). Penegap (teknologi) UNIMAS deka dichampurka enggau (teknologi) SIRIM ngambika ulih ngasilka pemutus ti tegap,” ku iya.

Dulu ari nya dalam jaku pengevalu program nya, kemari Zainal madahka SIRIM di negeri tu udah nempa kerejasama enggau MIETI sereta ngatur mayuh program pemansang orang dagang PKS sereta ngemansangka dagang mikro.

Komuniti di Sarawak ku iya, bis i nerima penguntung ari aplikasi teknologi SIRIM iya nya nyengkaum krafjari seramik, kosmetik, kereban dikena nuchi enggau generator mikro-hidro di Kpg Seri Stamang 2, Lubok Antu.

Projek komuniti pepadu baru SIRIM di Mukah iya nya ngemanahka agi asil sagu sereta program homestay ‘Siti Pelilih Siti Industri’ di Sadong Jaya, ku iya.

“Kelimpah ari nya, SIRIM mega bis i nyendiaka Program ‘Groom Big’ ti nyengkaum chara mungkus ke betul, teknologi enggau ngemanahka agi proses produk, ngaga web, latih kua liti enggau program pemansang orang dagang,” ku iya.